




# SIARAN AKHBAR


KEMENTERIAN KESIHATAN

## KENYATAAN MEDIA COVID-19 NEGARA BRUNEI DARUSSALAM 29 Safar 1444 / 26 September 2022

- I. Dalam masa satu minggu kebelakangan ini, jumlah kes COVID-19 yang dilaporkan di Negara Brunei Darussalam tidak menunjukkan banyak perbezaan dengan minggu sebelumnya di mana kadar purata harian kes pada minggu lepas ialah 210 kes sehari, berbanding dengan 215 kes sehari pada minggu sebelumnya. Sebanyak 37,733 keputusan ujian ART telah dimuatnaik ke aplikasi *BruHealth* dalam masa satu minggu di mana 3.9% daripadanya adalah keputusan ujian ART yang positif.



Jumlah kes COVID-19 yang telah dilaporkan di Negara Brunei Darussalam sejak Februari 2022



Jumlah kes COVID-19 satu minggu kebelakangan berbanding dengan minggu sebelumnya

- i) Pada hari ini, **tidak ada kes** di dalam Kategori 4 dan 5 iaitu kes yang memerlukan rawatan di Unit Rawatan Intensif (ICU) dan memerlukan bantuan oksigen.
  - ii) Sehingga kelmarin, 25 September 2022, kadar liputan vaksinasi COVID-19 di Negara Brunei Darussalam kekal berada di tahap yang tinggi dengan **78.4%** daripada keseluruhan rakyat dan penduduk negara ini telah mendapatkan dos ketiga vaksin dan **10.4%** juga telah mendapatkan dos keempat.
2. Pada hari ini, sebanyak **269 kes baru** telah dilaporkan iaitu 268 kes hasil ujian ART dan 1 kes adalah hasil dari 81 ujian makmal RT-PCR yang telah dilakukan dalam masa 24 jam yang lalu.

3. Di kesempatan ini, Kementerian Kesihatan ingin memaklumkan kepada orang ramai bahawa Pihak Berkuasa Kawalan Ubat Negara Brunei Darussalam (*Brunei Darussalam Medicines Control Authority, BDMCA*) telah meluluskan *Emergency Use Authorisation (EUA)* bagi penggunaan vaksin *Moderna (Spikevax Bivalent Original/Omicron)* bagi orang dewasa di negara ini. Kelulusan ini adalah berdasarkan dengan data klinikal bagi vaksin *bivalent* yang telah dihadapkan dan juga berpandukan kelulusan daripada pihak berkuasa kawalan ubat dari negara-negara seperti United Kingdom, Australia, Kesatuan Eropah, Kanada, dan Singapura. *Moderna Spikevax Bivalent Original/Omicron* ialah vaksin *bivalent next-generation* yang juga mengandungi unsur-unsur yang menyasarkan varian *Omicron*, selain varian asal. Vaksin ini dijangka akan tiba ke negara ini pada penghujung tahun nanti.
  
4. Sementara itu, memandangkan terdapat sedikit peningkatan pada *trend kes influenza-like illness (ILI)* di negara ini sejak dua minggu yang lalu, orang ramai adalah diingatkan untuk terus mengamalkan langkah-langkah pencegahan dan pengawalan bagi jangkitan respiratori, khususnya bagi sesiapa yang menunjukkan tanda-tanda jangkitan. Langkah-langkah tersebut termasuk mengasingkan diri dari orang lain di sepanjang tempoh mengalami simptom, memakai sungkup muka dan kerap mencuci tangan dengan air dan sabun atau menggunakan cecair pembasmi kuman. Perlu ditekankan bahawa langkah-langkah pengawalan bagi jangkitan respiratori ini adalah sama dengan langkah-langkah pengawalan bagi jangkitan COVID-19. Kerjasama orang ramai adalah

juga terus diharapkan untuk memuatnaikkan keputusan ART masing-masing, samada positif atau negatif ke aplikasi *BruHealth*.

5. Sementara itu, berikutan dengan kejayaan **Cabaran Satu Bilion Langkah Bersama** (*One Billion Steps Together Challenge*) pada bulan Ogos yang lalu, Kementerian Kesihatan ingin memaklumkan mengenai cabaran seterusnya di bawah inisiatif kempen *BN on The Move* iaitu **Cabaran 20 Bilion Langkah Bersama** (*Twenty Billion Steps Together Challenge*) yang akan bermula dari hari Sabtu, 1 Oktober 2022. Sasaran cabaran kali ini ialah pencapaian 20 bilion langkah dalam tempoh tiga bulan iaitu sehingga penghujung tahun 2022 ini. Dengan bermulanya Cabaran baru ini, orang ramai yang menyertai inisiatif *BN on the Move* juga berpeluang untuk memenangi hadiah-hadiah melalui beberapa cabaran-cabaran yang dianjurkan oleh Kementerian Kesihatan. Maklumat berkaitan dengan cabaran-cabaran tersebut akan dikongsikan di dalam aplikasi *BruHealth* inshaa Allah pada malam ini. Orang ramai yang belum menyertai inisiatif kempen *BN on The Move* adalah dialu-alukan untuk mendaftar dan menyertai inisiatif tersebut melalui aplikasi *BruHealth* masing-masing.
6. Sehubungan dengan itu, Kementerian Kesihatan mengalu-alukan penyertaan orang ramai dalam acara *Brunei Run* bersempena dengan Sambutan Hari Jantung Sedunia yang akan diadakan pada hari Ahad, 2 Oktober 2022 semasa acara *Bandarku Ceria* di Taman Haji Sir Muda Omar Ali Saifuddien, Bandar Seri Begawan. Acara ini adalah juga untuk menyokong inisiatif kempen *BN on The Move*, khususnya Cabaran 20

Bilion Langkah Bersama. Marilah kita bersama-sama bergerak untuk mencapai 20 bilion langkah pada penghujung tahun ini dan terus melakukan aktiviti-aktiviti kesukanan dan riadah bersama keluarga dan rakan-rakan supaya kita sentiasa dalam kesihatan yang baik dan optima. Teruslah bergerak untuk kesihatan, setiap langkah adalah penting. *Every Step Counts!*

7. Semoga Negara Brunei Darussalam berserta seluruh rakyat dan penduduknya sentiasa terpelihara dari segala bencana dan wabak penyakit serta berada di dalam perlindungan Allah Subhanahu Wa Ta'ala jua. Aamiin Aaminn Ya Rabbalalamin.

- **TAMAT** -

Rujukan : KK/PR/2

Tarikh : 29 Safar 1444H / 26 September 2022